

郭襄靖公遺集

天恩事萬曆元年五月二十二日准兵部咨該臣題
報剿平府江功次緣由該部覆奉

聖旨這山寇盪平各官効有勞績郭應聘陞俸一級
廕一子入監讀書還賞銀三十兩紵絲二表裏欽
此備咨前來隨據原差承差歐克讓齎捧

欽賞到臣臣當即望

闕叩頭祇領訖臣誠惶誠忭稽首頓首謹具本稱
謝者伏念臣本一介書生不知軍旅大計自備員
外服驅馳十有七年而歷官廣西前後凡逾一紀

目擊夷獠之害患在襟喉心懷攘斥之圖積非朝
夕比塵

簡拔彌切憂惶恭遇我

皇上臨御之初

天討昭宣江氛汎掃雕蹄椎髻之屬已盡囿於
皇風耕田鑿井之氓咸相忘於

帝力臣與有調度之責寔惟職分之常詎謂微蹤濫
膺

異數增俸旣超于常秩延賞尤沐乎

殊恩幣出 尚方金分 內帑游荷

駢蕃之錫益深瘝曠之慙臣敢不食祿懷憂勉紹箕
裘世業服膺圖報矢堅砥礪初心用殫涓滴之愚
衷少裨安攘之至計臣無任感激屏營之至

恭謝頒 恩疏

奏爲恭謝

頒恩事隆慶六年十二月初八日該提督兩廣軍務
兵部右侍郎兼都察院右僉都御史殷正茂差舍
人劉安國齎捧騰黃欽奉

勅諭到臣內開巡撫廣西都察院右副都御史郭應
聘兵備副使鄭茂龔大噐金柱沈子木僉事夏道
南各給與

誥命欽此臣當即望

闕叩頭祇領訖除將各應得

誥命類咨吏部請給外臣遵照禮部題

准事例率同副使鄭茂等謹具本稱

謝者伏念臣等祇役疆場無裨涓滴幸際

熙明之會方深尸素之憂詎期

曠蕩之褒綸下逮荒遐之臣屬允與兵防之寄共叨
封誥之榮 龍光迥邁乎尋常 鴻造均沾於存歿

如臣被

恩尤渥揣分增慙茲蓋

聖明孝治天下之盛心尤激勵邊臣之彝典也臣等
敢不矢圖報稱彌切捐糜覃布

皇慈望治平於有象奉揚

威命期氛侵之全銷庶幾少效微衷仰酬
覆幬於萬一矣臣等無任激切感戴之至

題報懷遠師期疏

題爲雨雪連旬阻師未進乞

請添調近兵以圖萬全併報取獲縣印事先准兵部
咨該臣等題報征剿懷遠徭賊阻於雨雪將官兵
暫行休息聽候再舉緣由本部覆奉

欽依行臣會同各官詳加計議用師若干合用錢糧
若干見今有無足用師期的在何時計議已定一
面將該省應調諸兵徑行督調一面奏下本部以
憑行催其餘一切機宜俱聽臣等從宜酌處并開

安其反側攜其黨與務攻其心以孤其勢等因續
又准本部咨談提督兩廣侍郎殷正茂題同前事
本部覆議行臣等查照將進征懷遠事理如增調
本省狼兵遠調湖廣鉤刀手及不得已借募浙兵
鳥銃手與師期遲速俱聽從長計議一面便宜從
事一面具

奏施行如果機會可乘即師期未及而舉之亦不謂
之輕動若機宜當慎即師期已及而不進亦不議
其後期重在肅將

天威輯寧地方閩外之事不從中制等因題奉

欽依移咨前來臣等竊惟我

國家之懷夷狄惟有剿撫二端從其順逆而已顧茲
懷遠惡徭造孽深重臣等自聞變至今銖計寸累
殆不啻卧薪嘗膽思欲滅此朝食以謝地方人心
以伸

朝廷正法仰荷

廟堂猷算既假以從宜酌處又許以不從中制用是
大小文武各官莫不感激思奮期欲自効萬分之

一隨即督行左布政使楊成按察使高察會同右
江守巡叅議李文續副使沈子木叅將王世科都
司掌印都司汪可大及總兵官李錫將查議過前
項徭賊相應剿撫村寨兵餉師期各緣由呈報前
來該臣會同提督兩廣軍務都察院右都御史叅
兵部右侍郎殷正茂巡按廣西監察御史唐鍊覆
議得諸徭負固稔兇戮官奪印法不容赦但今日
之舉惟在討罪正法不以殄類爲功臣等固不敢
爲姑息之謀以貽地方將來之患亦不敢爲窮兵

之計以重無辜槩及之殃要在銷弭禍本輯寧地
方足矣除白果諸獍黃土諸獍青淇大梅諸獍俱
行設法撫諭以安驚潰之心亦防其連合之患所
據太平河裏四港牙寨稿黃大地晏江濠等村訪
皆殺官奪印之賊東岸板江楊梅西岸坡頭河潺
等村俱係入縣必由之路乃原與陰謀及糾衆出
劫長安鎮抗拒官兵之賊均宜議剿近又有古田
上宋首賊常狼要乘機煽動糾合殘黨廖金濫陸
銀床等出沒爲患攻圍鳳凰理定大水田兵堡節

據永寧兵備道并永福陽朔二縣請兵防剿該臣等督發官兵星馳策應陸續擒斬首從賊徒共八十八名顆有常狼要帶同弟族常狼金等奔遯右江五都地方招賊爲助被哨守指揮徐民瞻等官兵裝伏生擒解赴右江守巡道審實監候起解其餘徒黨尚在竄伏窺伺未即解散其情狀反側與鎮堡素不相容則摘處倡惡亦勢之所不容已者若非厚集師旅恐彼此黨援非所以爲萬全之計隨行督調本省兩江土官兵共十萬員名約可實

兵四萬益以兩廣軍門借調兵三營差官往浙募
兵二營又准兵部咨仍調用鉤刀手三千名分布
水陸共七哨合用糧餉以二月計之約用銀五萬
餘兩其防剿殘徒則又難以一一預計者頃蒙部
議准於善後銀兩動支但善後銀兩見存僅七萬
有奇若盡以充用何以備永寧歲支之費仍乞容
臣等於原 奏留事例贓罰稅畝等銀內暫行借
支劑量節縮以濟兵費即今各土官兵陸續已據
報出尅定十一月中旬齊集慶遠賓州二路計程

督發前進一應哨道監統等官臣等酌量委用不敢再行煩瀆其古田殘徒仍聽臣等審時度力相機撫剿通候事完將前後功罪人員另行分別具題外謹具題知

討平懷遠捷音疏

題爲仰仗

天威討平倡惡叛猺恭報全捷事照得懷遠諸猺叛撫倡亂戕殺命吏罪惡貫盈先該臣等會同題報議將府江征兵摘發順剿續因雨雪連旬阻師

未進又經臣等題 請添調近兵以圖萬全該兵
部覆奉

欽依備咨到臣聽臣等從長計議一面便宜從事一
面具 奏施行臣等欽遵覆行布按都三司右江
守巡各道并總叅等官查議過相應撫剿巢寨及
兵餉師期緣由呈報前來臣等一面將本省各府
州土兵差官督調移咨湖廣浙江貴州各巡撫軍
門借調鈎兵浙兵及發兵於湖廣綏寧縣貴州永
從縣各隘路立營堵截并行布政司計辦兵餉柳

慶桂平等府辦集糧米器械船隻等項一面差官
主簿李材等將黃土諸洞青淇諸徭北果諸徭通
行招安以攜賊黨及差名色把總蕭紳哨官鍾球
等用聽撫徭人引入諸巢設謀用間諭令擒獻首
惡以免加兵乃各徭頑悍成性全無悔悟之心仍
不時潛出長安近村殺掠人口牛畜臣等相度事
勢撫擒之計百無所施防守之費歲以萬計聲罪
致討之師誠有不容以已者乃復徵促土募諸兵
爲必剿計至十一月初旬據右江守巡道呈報各

土兵已集賓慶二路提督兩廣軍門添發浙兵三營俱至柳州浙江軍門差官督押原募浙兵二營亦以此時並至又該湖廣巡撫軍門節行辰沅兵備道督發永保等兵由靖州而進貴州軍門亦行永從縣分兵把截各咨報到臣隨將各官兵水陸分爲七哨坡頭哨以叅將錢鳳翔縣北哨以叅將王世科縣南哨以都司楊照板江哨以原任潯梧叅將亦孔昭湖兵哨以原任都司魯國賢各統督總兵官李錫總統各哨居中調度兼督大榕江軍

聽潭二水哨俱以副使沈子木監督叅議李文續
總理糧賞及委同知推官知縣等官分理糧餉諸
務又該巡按衙門行委永寧兵備副使莊國禎紀
驗功次分派已定通行大小文武官員各遵照剋
定萬曆元年十二月初四日辰時開刀分道抵巢
按圖撲剿及具本題 知訖隨准總兵官李錫并
提監督副使沈子木各報稱十二月初四日官兵
進至板江各徭賊先將木石阻塞江灘聚衆千徒
船百餘隻爲旅拒計及見水陸二兵夾岸並進賊

遂望風奔潰我兵併力拔木毀石而入乘勢追擊
初七初八等日連撲丹陽蕉花中園田寨古立洛
杲火燒合水諸巢擒斬首賊榮才富吳金田并賊
徒共一百二十五名顆賊衆數千併聚丹竹楓木
之間櫛層巒阻陡澗爲固總兵官督令土募諸兵
分方夾剿各賊致死衝突募兵整陣直前奮擊賊
以大敗棄金鼓甲冑越大稜嶺而遯各哨陸續擒
斬共四百二十二名顆官兵追至縣治叅將王世
科報稱太平河裏倡惡各巢賊俱集天鷲嶺十二

月二十一二等日官兵結舟渡江分哨前進直搗
天鵝嶺至七團四寨腮江巴崗等巢生擒首賊隆
扶羊斬獲束帶披甲首賊王伯牛爺等三名擒斬
賊徒共四百四十二名顆弁獲鶴頂榆木黑花帶
皮印囊各件風紀輯覽通報等書正月初七日湖
兵進至諫冲當行分發大藍公和唐朝山等巢撲
剿所向披靡隨據叅將錢鳳翔報稱稿黃大地及
板江田寨各巢賊屯聚郡鄧大山以數千計聲勢
甚大請兵策應該臣當行總兵官挑發各哨勁兵

協力合剿賊復大敗各哨擒斬首賊千弟保弁賊
徒共一千零五名顆該總統哨又探得縣南縣北
諸賊復奔據地名八寨列重柵死守本月十七日
督令官兵探入窮樛賊男婦俱鬪矢石如雨標募
諸兵以死決戰土兵繼之砍柵而入四面舉火煙
焰震天賊大敗潰各哨陸續擒斬首賊榮田師弁
賊徒共一千二百九十名顆奪獲原劫馬知縣雲
鷺補青圓領一件主簿李材督聽撫徭兵報効助
戰擒斬五十九名顆計各哨自十二月初四日開

刀起至二月初九日止總統哨共擒斬過三百一十四名顆坡頭哨共擒斬過七百零六名顆縣止哨并徭兵共擒斬過七百零七名顆縣南哨共擒斬過七百五十一名顆板江哨共擒斬過四百三十五名顆湖兵哨共擒斬過四百三十一名顆以上通計擒斬過首從賊人賊級三千三百四十四名顆俘獲賊屬男婦二百六十三名口奪獲賊牛四十九頭賊船八十六隻賊賊雲鷺補圓領一件鶴頂榆木黑花帶各一件皮印囊一箇錫牌一面

風紀輯覽通報各一本漆藤榻一張鐵盔八十五
頂鐵甲一百一十一領槍刀牌弩等項器械共一
千七十九件除生擒猺賊遵照嚴法令以靖地方
事例會官審決賊級行紀功官審驗賊屬牛隻變
價充賞賊仗收庫及行總兵官李錫弁監督道將
湖兵募兵先行掣散摘留土募等兵屯劉板江兩
岸撫插殘徒處分善後外該臣會同提督兩廣軍
務都察院右都御史兼兵部右侍郎殷正茂議照
諸猺憑恃險阻久肆陸梁據縣治已將百年侵融

界又逾拾里嚮雖畏威而聽撫隨即背叛而倡狂
殺官奪印敢自犯乎

王章抗摘阻兵復震驚於內地人心共憤

國法難容臣等夙夜憂惶每恨妖氛之未掃多方論
撫惟恐玉石之俱焚不得已而請調鄰兵議留帑
積蓋將浹歲于茲矣幸賴

天威震讐

廟算周詳 密勿仰贊玄機筦樞遙授方略示臣以
分止之意假臣以便宜之權故得畢力驅馳隨機

剿撫水陸並進內外夾攻自板江以至鴛嶺由田寨以及猺籠西抵貴疆止聯楚界下堅巢不啻百數獲功級已逾三千宿侵頓消殘民再輯幸復版圖之舊實仗

社稷之靈顧臣踈庸謬叨任使不能銷萌杜釁以成曲突徙薪之謀卒至動衆勞師而爲亡羊補牢之計方屏營以待罪敢貪冒而言功但文武諸臣同心僉力勞勩寔多臣誠不敢隱蔽除領哨隨征人員功次聽巡按御史覈實奏繳軍前供事雜職

等官臣等徑行分別獎賞及照提督兩廣右都御史殷正茂才略匡時忠誠報

主自古田恢復之後威名雷動於百蠻暨梧鎮經畧以來膚功日奏於五嶺料敵決勝獨運沉機于九天遣將增兵坐收勝算于千里事皆百發而俱中臣寔仰藉而告成湖廣巡撫都御史趙賢浙江巡撫都御史方弘靜貴州巡撫都御史蔡文共抱攘夷之偉畧同懷體

國之真心羽檄交馳吳楚之貔貅畢集威稜遠播

陽之狐兔潛消而湖兵千里赴調百戰長驅勢寔厚於如林功尤奇於破竹巡按廣西監察御史唐鍊目擊時艱拯救有同於焚溺首聲

天討折衝時見於科條允茲摧廓之功悉藉澄清之力但俱爲憲臣奉有明例不敢妄敘原任廣西左布政使今陞應天府府尹楊成始事紆籌兵食皆資其調度憂時懇切保釐更繫於去思已經

簡用亦難槩述看得總統諸哨鎮守廣西地方總兵官征蠻將軍右軍都督同知李錫夙負鷹揚久諳

豹略總樓船而西下士氣倍增冒矢石以先登夷
酋震懼厚集聲援動必求其萬全遍歷巖箐功遂
收於三捷此一臣者閱歷既深勲猷彌著所當特
加優叙者也監督諸哨分巡右江兵備道副使沈
子木才猷縝密智慮精詳憤諸蠻之縱橫誓欲滅
此而朝食談夷情之阨塞真如借著以前籌百事
皆資成算良工獨見苦心始而分疆飭戎變本生
於倉卒終而犁庭掃穴功實倍於桑榆總理糧賞
分守右江道叅議李文續實心任事銳志除殘糧

餉之輸給以時士皆宿飽師旅之止齊不爽民免
驛騷憤厲益虔遇盤錯而不避艱虞共濟合謀斷
以兼資紀功永寧兵備道副使莊國禎宏材朗識
甲兵已富於胷中亮節芳猷韜略時談於掌上紀
驗之規條屢布斬馘之冒濫一清統督縣北哨分
守柳慶叅將王世科締略深沉事機嫻習牙寨四
港旣霆擊而颺馳河裏諸巢復禽獮而草薶首功
居最勅寇獨當雖稍失於東隅終無忝於智帥統
督坡頭哨分守潯梧叅將錢鳳翔鎮靜有謀安紓

不擾蕉江擊楫長蛇已斃于穴中稿大連營封豕
盡殲於境外常逡巡而對敵不嗜殺以邀功統督
縣南哨都司僉書署都指揮僉事楊照器度溫純
才識通敏馭兵亦知寬猛臨事不見張皇摧塘堀
之危巢勢成犄角追郡鄧之逸黨功收網羅統督
板江哨原任潯梧叅將亦孔昭才名夙著悔悟方
新率部卒以抗衝流嚴防奔突之患合水軍而臨
勁敵共成撻伐之功統督湖兵哨原任都司魯國
賢聞命疾趨助勦不辭乎鄰壤董師深入指麾足

懾乎强夷矍鑠不忘據鞍澗池猶堪奮翼以上八
臣皆夙夜戎行心力殫瘁俱宜優敘內沈子木李
文續王世科先該臣等參論住俸戴罪管事今賊
已討平功浮於過所當開俸仍行敘錄者也原任
按察使今陞本省右布政使高察按察使仍管分
守桂林道左叅政事吳一介督理糧儲右叅政李
鳳分守蒼梧右叅政鄭茂清軍副使劉廷舉分巡
桂林兼理撫夷副使今聽勘金柱府江兵備副使
徐作湖廣辰沅兵備副使史嗣元分守左江叅議

高則益分巡蒼梧僉事夏道南提學僉事江圻湖
廣分守靖州叅將槐寅都司掌印署都指揮僉事
汪可大僉書署都指揮僉事許文或分猷共濟定
師謨於發難之初或隨事贊襄効靖共於職司之
內或署篆嚴明百需因以取給或治兵整肅我武
爲之維揚或敷文教而兼與機宜或奮武衛而申
嚴封守以上諸臣皆共成敵愾茂著賢勞所當併
敘重加賞賚內史嗣元辛勤調發不忘唇齒之憂
槐寅慎固隄防更切綢繆之慮尤宜優論者也原

任柳州府今調梧州府知府許嶽見任柳州府知
府熊曠桂林府知府彭文質平樂府知府陳子佐
慶遠府知府張宓思恩軍民府知府侯國治柳州
府同知王任重慶遠府同知蕭騰鳳桂林府同知
陳所學通判蕭時中潯州府通判朱成武湖廣辰
州府通判蘇繼文柳州府推官高曰化都司都事
周鳴鎬賓州知州張樞湖廣靖州署印同知黃恕
興安知縣黃褒上林知縣王一岳融縣知縣李邦
仁馬平知縣趙宜思恩知縣吳鎮羅城知縣陳宗

堯柳城知縣佘光裕湖廣署綏寧縣事靖州判官
堵釋貴州永從縣知縣楊春煦或簡徒警衆或繕
械峙糧或分理餉需或查覈功次或衝途應辦或
鄰境戒嚴職任雖有不同勤勞均爲可錄所當併
加賞賚內許嶽高曰化原亦在叅論之列但許嶽
今已調任高曰化最効憂勤應從寬賞仍加賞賚
者也湖廣原任守備孟儒慶遠守備甘棠兩廣軍
門坐營以都指揮江濬浙江領兵原任吳淞江把
總施有敘南京豹韜左衛中所千戶蕭一愚兩廣

軍門領兵名色把總吳天賞總兵標下名色把總
王鸞汪天寵或協贊於軍前或奔馳於境外或收
抗拒之効或奏追逐之能所當均加賞賚者也各
府州司崗土官思明府土官黃承祖東蘭州土官
韋應龍南丹州土官莫之厚那地州土官羅忠輔
泗城州土官岑紹勲歸順州土官岑瑾思明州土
官黃恩隆江州土官黃恩龍英州官男趙邦興龍
州官男趙英忠州官男黃有翰武靖州官男岑清
寶奉議州流官判官楊絲上林縣官男黃允章下

石西州官男閑文經永順長官司土舍鄧承印彭
大武上映崗崗長許世興下雷崗崗長許宗蔭湖
潤寨巡檢司土舍岑壽松鎮安府總目常農思恩
府古零等司土巡檢覃文顯徐浩常顯威黃正黃
誠祖土目潘承紀官男王觀官族常寬遷隆崗官
弟黃一理安隆長官司頭目黃榮連年赴調多破
斧缺折之勞盡日窮追成傾巢落卵之績而湖廣
永順司官男彭永年保靖司官男彭養正鎮谿所
土指揮張寬亦皆賈勇先登深入致討雖功級或

有多寡而趨事則無後先所當查明功次分別議處准給服色實授署職冠帶賞勞以爲諸酋長之勸者也再照融縣千戶所百戶任邦祚職司哨捕而先事逃回名色鎮撫朱萬世冠帶生員楊宦責專撫徭而知情縱寇失事之罪原爲首論內楊宦已故姑免追究任邦祚朱萬世二員向因談道責成撫處未及究治今雖有擒斬微功終難贖踈虞重罪相應仍行提問發落其知縣馬希武等官仍照兵部原議聽巡按衙門查明分別恤錄如蒙

勅下兵部查果臣言不謬擬上

請蚤賜施行則常罰丕章將士競奮

皇威益振於有截 聖治永保於無疆矣

請建新寧州左州學校疏

題爲建學校以振風教事據廣西布政司分守左
江道左叅議高則益呈蒙巡按廣西監察御史唐
鍊牌行本道查議太平府左州南寧府新寧州請
詳建學緣由該本道行據各府查得左州原係土
司衙門自成化十四年議改流官新寧州原係四

崗地方自隆慶五年議設州治即今二州之氓耕
食鑿飲出賦稅以供上咸有樂生之心訓子弟以
業儒孰無興行之願但夷風之漸染或未盡祛而
文教之敷宣委不容緩在左州廟廡堂齋先年俱
曾脩建在新寧州工役旣畢木植有餘足堪創豎
而兩地幼童及寄籍居民亦皆有進取之資則二
州斯時興學校以明禮義易椎髻以尚衣冠誠地
方之首務也今各該州申議前來相應俯從題

請建設等因呈報到臣又經備行提督學校按察司

僉事江圻覆議相同外該臣會同提督兩廣軍務
都察院右都御史兼兵部右侍郎殷正茂巡按廣
西監察御史唐鍊議照風俗之轉移在教化而教
化之本原在學校故善治者不擇地善教者不易
民蓋其人心興起之機初不因遠邇邊腹而有殊
異者也左州與新寧州係改土爲流之郡正用夏
變夷之期其學校之設視他郡尤爲緊要先年未
經建設者意謂風氣初開人文未著必有司官振
作造就少俟有成方克舉行耳近該巡按御史唐

鍊出巡左江按歷二州察其吏治民情已頗超乎
尙寨蠻荒之習觀其冠裳形勝又何異乎中華文
物之區建學立師此其時也先該提學道考校之
時亦各取有童生十數名附寄他庠近談各州中
送童生三十餘名巡按衙門考試亦頗能文委堪
作養今若俯順人情而建立之不惟俾已知習學
者奮其向上之心而夷方未定之俗亦漸磨于禮
教之中矣况兩州上下人心翕然稱便各道三覆
查議不謀同詞相應依擬

上請如蒙乞

勅該部再加查議如果臣等所言不謬將前項二州
各銓選學正一員竝鑄頒印記二顆令其前來督
率其廩增名數聽提學道量材考取一切齋膳官
牆等項聽臣等督同道府酌處舉行庶儲材有地
司教有人

聖門絃誦之聲即可漸通于絕徼而
熙朝樸棫之化自將遠被于遐方矣

剿平洛永獍寇 捷音疏

題爲僮寇糾黨爲患官兵乘勝剿平通論功罪以
昭勸懲事案照先據永寧州并永福陽朔二縣各
報稱萬曆元年八月內有永寧上宋首賊常狼要
因讎殺撞人黃銀成常安鎮土司窮治其事狼要
遂倒牛軟血糾合永福邊山陽朔碎江等賊攻圍
鳳凰理定大水田兵堡梗阻江道敵傷官兵千戶
章繼宗被箭傷身故碎江諸賊又奔擾荔浦山灣
等處爲患各請兵防剿該臣等督發官兵分投策
應賊勢屢挫常狼要遂帶同弟族遯往右江地方

招賊爲助被哨守指揮徐民瞻等官兵裝伏生擒
解道其黨奔回仍前糾聚臣等因懷遠方在興兵
督行該道設法撫安已於懷遠師期疏內題

報竝議相機撫剿訖緣各賊自恃險阻屢招不服切
近省城人情危懼隨該臣等會行鎮守總兵官署
都督同知李錫摘調田州向武都康土兵七千餘
名分發各州縣防守一面行令永寧叅將王瑞桂
平叅將王承恩都司掌印署都指揮僉事汪可大
興安守備凌文明永福守備康仁各統領前兵將

陽朔碎江一帶竝遯據山灣諸賊先行剿除行委
按察使仍管左叅政事吳一介監督哨務及該巡
按御史唐鍊慮將士懈怠案行永寧兵備副使莊
國禎紀驗督責所獲功級准與懷遠功次一體敘
報以勵兵心續於二年正月初十等日據按察使
吳一介報稱各哨官兵俱遵奉剋期竝進首破賊
于茶溪鏖戰數合各賊奔潰諸官兵隨賊向往併
力窮追叅將王瑞部下斬獲首賊廖金濫廖金盞
常銀花常狼相莫伯雍并賊徒共三百一十九名

穎都司汪可大部下生擒首賊一名黃朝解斬獲
首賊莫鑑從莫良行并賊徒共三百零七名穎叅
將王承恩部下擒斬共二百二十一名穎有平樂
所緣事副千戶張世勲衝鋒破敵手刃二賊被傷
陣亡守備凌文明部下共擒斬賊級一百三十四
名穎守備康仁部下共擒斬九十五名穎各哨通
共擒斬過一千七十六名穎獲賊屬男婦八十一
名口牛馬四十頭匹器械九十五件繪畫黃衣一
件俱已解驗明白至本年正月十八等日又據

寧兵備道副使莊國禎右江兵備道副使沈子永
右江分守道叅議李文續各報稱有洛容縣托定
洛斗獐賊與永寧古底上宋及永福理定沙羅等
賊於本月初八日夜潛集城外至五更時分二三
十徒由縣後山嶺原無城垣去處乘黑偷入徑抵
典史謝漳住所逼取印信呐喊而出官兵居民登
時與賊拒敵哨守柳州衛指揮朱昌胤等兵斬獲
賊級二十三顆常安鎮土巡檢常顯忠等兵斬獲
賊級三十一顆典史謝漳被傷身故兵民被傷一

十三名各賊見官兵勢勇四散奔遯古田千戶所
百戶蔣文斌張汝能名色把總胡德忠土巡檢常
顯忠各領兵追捕斬獲首賊常朝義覃三官并賊
徒共八十三名顆印信被哨官朱昌胤追回見解
柳州府另行委官署掌各呈報到臣臣即批行布
按都三司及各道嚴行查勘又該提督兩廣右都
御史殷正茂咨臣并通行各司道作速議處續據
呈稱洛容縣治屢經殘破久已頽廢後山一帶原
無城垣先任知縣邵廷臣申爲俯順輿情遷移垂

絕縣治等事議遷縣城於地名白龍巖屢奉臣等
批行該道勘處以有事懷遠未遑即舉一向縣官
俱寄住柳州府城近因邵知縣丁憂去任典史謝
漳護印巡捕到彼各糧聞知懷遠大兵俱已克捷
又傳聞典史有請兵剿捕之言自生疑懼欲爲執
質挾撫之謀乃糾黨潛入奪取印信僞僞典史謝
漳拒敵身死該縣原無庫藏獄囚城中兵民原不
滿四五十家除被傷一十三名餘各無恙今各賊
屯聚西鄉上宋等處聲言仍要攻打城堡以圖報

復乞將懷遠大兵掣移順剿庶殘兇不至漏網等
因該臣等看得各賊自負生全屢肆兇虐劫印挾
撫致戕職官罪惡貫盈必不可宥雖經官兵登時
敵遞擒斬多徒印信旋即追回然且包藏禍心嘯
聚未散叅酌事勢終難羈縻若候具

請定奪不即移師亟剿他日重複徵調勞費百倍臣
等玩寇之罪更復何辭隨即覆行總兵官李錫將
懷遠各哨土兵量留善後餘俱掣調前來分爲四
哨一抵永寧以剿古底上宋諸巢令叅將王瑞統

之一抵永福以剿理定海灣諸巢令原任叅將門
崇文守備凌文明康仁統之一抵洛容以剿托定
洛斗諸巢令原任叅將亦孔昭統之一從柳城以
剿上油諸巢令都司楊照統之而監督則以屬之
按察使吳一介副使沈子木莊國禎糧賞則仍屬
之叅議李文續而總兵官李錫以舟師屯劄理定
江居中調度各照剋期前進續於二月二十六等
日准總兵官李錫并據按察使吳一介副使沈子
木莊國禎各報稱各賊風聞官兵將至多棄原巢

深遯山箐據險自固各哨官兵奮勇追擊永寧哨
攻剿古底上宋大虫天心塘等巢生擒首賊覃狼
印斬獲首賊覃金鉢覃金倒覃百長覃銀郎并賊
徒共八百九十七名顆永福并總統哨攻剿思位
狼家等巢生擒首賊羅仁周王朝傍斬獲首賊莫
扶頂覃應黨羅文朝羅公盤覃朝俸并賊徒共一
千零五名顆洛容哨攻剿托定洛斗理伏川巖等
巢峒斬獲首賊陶狼金陶狼漢羅道章陶銀定陶
金總羅道印羅顯陽陶朝漢并擒斬賊徒共五百

一十八名顆柳城哨攻剿上油上良里廟等巢崗擒斬賊徒共七百二十三名顆各哨共擒斬過三千一百四十三名顆俘獲賊屬男婦二百九十三名口奪回被虜一名周扶牛五十三頭器械二百六十二件書籍五本遠年關防一顆以上三項通計擒斬首從賊人賊級共四千三百五十六名顆俘獲賊屬男婦三百七十四名口被虜一名牛馬九十五頭匹器械書籍黃衣關防等項共三百六十四件除生擒賊徒照例會官審決賊級行紀功

官審驗賊屬牛馬變價充賞器械收庫及行總兵
官并各道將各殘徒招回安插仍於各要害處所
屯兵防守外該臣會同提督兩廣軍務兼理糧餉
都察院右都御史兼兵部右侍郎殷正茂議照粵
西獍獍盤據日久鴟張豕突自昔已然迨古田大
征之後地方始稍寧輯顧其種類繁多株連數邑
如古底上宋碎江涼境理定等巢則皆已剿而未
盡托定洛斗上油邊山等巢則皆告撫而未征蓋
在當時其勢固未能以盡殲而其心亦不忍於殫

戮誠體

朝廷好生之仁以開餘黨更新之路也詎謂豺狼異
性終不可馴迺因讎殺忿爭遂爾糾黨倡亂梗阻
江途攻掠封堡州邑爲之騷動會省亦以戒嚴甚
至潛越縣城執奪印信如洛容所爲者臣等朝夕
兢惕莫敢寧居幸乘懷遠大捷之餘遂爲移師順
剿之計前後不滿旬月俘馘已踰四千士女驩騰
封疆按堵向非仰仗

聖武神威

廟謨石畫則支黨鉤連遐邇響應其憑陵流突之患
又不知當何如耶所據文武諸臣職任不同功罪
亦異若不細加分別何以明示勸懲謹計前後而
通論焉如監督按察使仍管左叅政事吳一介才
猷卓犖注措自合乎韜鈴督察嚴明精彩遙分於
部曲擅駕輕就熟之能抱長驅遠馭之略統督諸
哨永寧叅將王瑞都司掌印署都指揮僉事汪可
大都司僉書署都指揮僉事楊照原任潯梧叅將
亦孔昭原任永寧叅將門崇文興安守備凌文明

同懷敵愾之心共樹襄夷之烈分道竝進歷巖菁而不辭賈勇長驅竭夙夜以從事或據險而列柵或摧堅而禱吭臨陽之氛祲悉消或自西而徂東或犄前而角後洛求之堅巢迅掃以上諸臣皆有功無過所當重加優敘者也又如布政司署印分守蒼梧道右叅政鄭茂贊襄戎務機宜素富於曾中府江兵備道副使徐作申飭兵防殘寇盡殲於境上分巡桂林道副使王天爵甫臨治境銳志驅除提學僉事江圻前攝撫夷悉心籌略都司僉書

署都指揮僉事許文初亦驅馳戎壘兼有斬馘微勞以上諸臣所當並敘者也又如右江兵巡道副使沈子木永寧兵備道副使莊國禎分守右江道叅議李文續分守柳慶叅將王世科署永寧叅將事副總兵張斌職列封疆任同鎖鑰心力非不殫瘁隄防未免踈虞戎務勦勦或至顧彼而失此夷情反側無能早見而預圖但當前寇衝突之時正懷遠窮追之日王世科間關百戰沈子木等勞苦經年况近日諸哨之分布無非各効其忠猷而一

月三捷之奇功又已盡夷乎羣醜張斌已被論而
褫職因候代而暫留情俱可原罪當並宥桂平叅
將王承恩始遇寇于山灣不無張皇之失繼連營
於杜莫亦收俘馘之功履任方新後効可責永福
守備康仁獍寇縱橫未聞捍禦之策江道梗阻至
貽行旅之憂顧自切責以來頗知奮迅自勵黃源
隘之奪險可尚邊山寨之掃穴尤奇又如柳州府
知府熊燿永寧州知州唐執中陽朔縣知縣鍾昌
永福縣知縣鄭佐均有分土之寄俱乏先事之防

但寇患旋已底平戎務尤多鞅掌以上諸臣功過
相準所當免究者也又如哨守洛容縣柳州衛指
揮朱昌胤才本駑劣氣乏鷹揚寇在門庭偵諜久
虛於平日謀踈棄土禍變遂發於一朝雖有微功
難贖前罪常安鎮巡檢司土巡檢常顯忠本以土
族之微承茲世守之寄上宋之渠兇首累旣不能
力遏其鋒洛容之聲息先聞又不思預弭其患應
援雖勇罪責有歸哨守理定堡百戶何勝今百戶
蔣濂濫叨巡徼之職全無防禦之能一則託病優

游視寇患若秦越一則首鼠逃竄棄信地如弁髦
旣縱寇而殃民宜明罰以勅法哨守陽朔縣桂林
中衛指揮葛希亮聞警辟易枕戈之志已衰袖手
旁觀同舟之誼安在論地方原非專責語失事尚
爲稍輕以上諸臣或功微而罪重或有罪而無功
所當提問究治者也乃若臣與總兵官署都督同
知李錫竝受

國恩共膺閫寄雖同心而僇力曾何補於時艱至動
衆而興師猶時聞乎寇攘在李錫身先士卒屢立

戰功尚有可言在臣則撫綏失宜發縱無術罪復何諉乃今得遏濫觴之流撲燎原之焰則皆提督兩廣右都御史殷正茂籌畫之功及巡按監察御史唐鍊督勵之力臣何與焉再照摧堅陷陣固將領職分之常而褒勇勸忠尤

聖世磨鈍之術今千戶張世勲童繼宗死事雖有不
同捐軀皆爲可憫而典史謝漳獨處危城首抗賊
鋒亦應量卹以示風勵至於各土官如鎮安恩明
二府東蘭那地南丹泗城歸順龍英龍州江州忠

州武靖奉議思明下石西等州上林縣永順安隆
各長官司思恩八司上映下雷湖潤遷隆等峒寨
前在懷遠破賊已該臣等題

報今復效有勞勩似宜通行竝敘其田州土官知州
岑太祿向武州土官黃瑚都康州官舍馮紀先期
掣調驅馳于陽永之間最久前後所獲功次與懷
遠各州相當應准一體敘錄伏乞

勅下兵部將臣等所論前項文武官員功罪再加議
擬上請施行庶

恩威並著勸戒攸彰將吏益知感奮而地方有賴矣
題報大臣服闋疏

題爲大臣服闋事據廣西布政司呈據柳州府申
稱查得馬平縣原任兵部右侍郎張翀先於隆慶
五年九月初八日丁母李氏憂守制在家扣至萬
曆元年十二月初八日止除閏實計二十七箇月
服闋申報到司緣係大臣擬合呈乞具題施行
等因呈報到臣該臣會同提督兩廣軍務兼理糧
餉都察院右都御史兼兵部右侍郎殷正茂巡按

廣西監察御史唐鍊議照原任兵部右侍郎張紳
經濟康時忠貞貫日虔臺秉鉞三巢之氛殺金消
楚鎮乘輅七澤之威稜丕振方承樞筦之

召遽動庭闈之思孺慕終身孝行允孚于月旦憂居
三載素望益繫於蒼生當

聖明更化之初正夢卜求賢之日旣經談司呈報本
官服闋相應具題伏乞

勅下吏部查照舊例遇有卿貳員缺將本官及時起
用庶其平生之風猷得以盡展而於

清時之治理必大有裨矣

保任兵備官員疏

題爲保任兵備官員以安邊壤事照得廣西右江
兵備兼分巡一道所轄柳州慶遠思恩鎮安四府
及泗城田州等土州壤接湖廣雲貴之交大較土
夷猺獞居十之九編氓僅十一爾而柳州之屬夷
情尤重自賓來以達郡城官道一行之外悉爲榛
莽之場自象武以達慶遠大江數百里之旁盡屬
蛇豕之窟其蠶食之害流毒之殃臣所觸目而寒

心非一日矣頃歲八寨聽招設立守備及長官司
坐鎮其地北三北五諸崗亦稍就羈縻近復討平
懷遠及托定洛斗上油下油諸寇其旁近如三都
五都里隆潮水思管都早等巢一時聞風懾伏是
固地方寧謐之會矣顧夷性叵測難保無攜貳之
心州邑孤懸所至有寡弱之慮所以整飭兵防宣
布恩信申嚴法令爲銷萌保泰之圖惟兵巡該道
是賴兵巡之得人與否一方之安危寄之所係誠
非尠小也見任右江兵巡道副使沈子木一念之

憂勤旣悉心於保障連年之征討復殫力於驅馳
但計資俸已深陞遷在邇若非得人以繼之恐夷
情視以向背臣竊爲地方憂焉該臣會同提督兩
廣軍務都察院右都御史兼兵部右侍郎殷正茂
巡按廣西監察御史唐鍊查得分巡蒼梧道僉事
夏道南年力精明風猷英敏入仕籍畋歷多年任
蒼梧前後數載獠夷之情狀周知戎務之機宜曉
暢監督府江東岸曾收盪定之功計處懷集山徭
尤著經畧之蹟蓋其志切於自效而才又足以副

之也若以本官代右江兵巡之寄脩廢舉敝杜漸防微庶幾豺狼反側之念可以潛銷地方兵革之事得以少息矣伏乞

皇上軫念邊陲重地兵巡重寄

勅下吏部再加查議如果臣等所言不謬候副使沈子木陞任將僉事夏道南就近推陞前缺領

勅管事假以歲月聽其便宜一切脩城練兵禁奸戢暴招攜懷遠凡可以杜隱釁而保成功者著實舉行必使民夷寧輯水陸肅清以仰副

聖明擢用之意地方幸甚臣等幸甚

恭謝 恩賞疏

奏爲恭謝

天恩事萬曆二年六月初三日准兵部咨談本部題
覆臣奏報懷遠捷音緣由奉

聖旨是殷正茂賞銀三十兩紵絲二表裏郭應騁陞
俸一級還與李錫趙賢各賞銀二十兩紵絲一表
裏方弘靜蔡文各十五兩其餘依擬欽此欽遵備
咨前來隨於本月十二日據承差秦俊民齊捧前

項

欽賞銀兩表裏到臣臣當即望

闕祇領叩頭謝 恩外伏念臣猥以庸駑濫叨撫綏
當徭夷侵軼之初乏桑土綢繆之策惟席藁以待
譴迺鞭策而圖成仰仗

皇威恭行 天討 廟謨指授虜已在其目中將士

欽承功遂收於閫外櫓槍汎掃豈曰人力之與能
巖藪廓清寔藉

玉猷之允塞衆咸歡慶臣獨忝營詎期

雨露之恩沾被草萊之賤祿秩所以勸士金帛用之
旌勤在

明主尚愛乎一頓顧微臣已叨於

三錫雖賞疑惟重益弘大造之仁而食浮於人彌
切素餐之懼雖幣兼頒于

冀闕駢蕃尤侈于遐荒拜

命驚慙撫躬踧踖臣敢不勉圖末節矢殫孤忠實壑
實壙銷未萌之釁孽廼疆廼理安甫定之瘡痍少
効大馬之涓埃仰酬

覆載於萬一臣無任感激屏營之至

郭襄靖公遺集卷之三終